

省

齋

集

四



膳錄監生臣任溥

膳錄監生臣黃鍾

欽定四庫全書

省齋集卷七

宋 廖行之 撰



連珠拾遺占牛初星紀之墟瑞啓應主考日至地中之
景方慶應長之始益知泰道之亨恭惟某官順陰陽消
長之宜奉時令賞刑之政澄清有志已觀惠澤之交乎
欽恤為心咸仰平反之罔滯茂對書雲之旦薦迎純嘏

之休某疾方阻於負薪禮莫陪於賀燕當君子大來之
吉已欣上下之交侈康侯晝接之榮即對庶蕃之錫永
言頌系莫罄敷宣

賀莫漕冬啓

禮樂光華咸企二天之庇陰陽施化迺迎至日之長顧
莫稱介壽之觴其敢後宣心之牘恭惟某官高風峻整
雅志澄清與時偕行益懋亮功之績所居類至方凝視
履之祥允協昌辰彌隆睿眷某棲遲蠻徼鞅掌郡丞誦

召伯黍苗之詩正仰沾濡之澤賡魯侯閟宮之頌敢陳
熾大之辭傾祝之誠敷宣罔既

元正與憲啓

厯首三元有初肇序律調一氣其應始和茲維道長之
時允屬泰來之吉恭惟某官撫辰凝績與國齊休奉寬
大之詔書密贊發春之意振滯淹於民俗妙通啓蟄之
功茂對青陽佇登黃閣某庇身宇廈引睇星符服制以
綦難綴班庭之慶願言伊夕即觀召節之歸

賀沅靖守元正啓

葦桃在戶又新一歲之儀椒栢稱觴溥介百年之壽惟
時碩德茂擁繁禧恭惟某官德秉粹溫政推豈弟承流
宣化均陽春布澤之施鑄頑成仁協品物更新之應撫
辰凝績視履考祥方當彙征元吉之辰竚對晝接康侯
之寵某屏星負乘鄰燭映輝豈無頌言可祝公侯之純
嘏亦有官守難陪賓客之後塵傾望之私敷云罔既

賀沅靖倅元正啓

鷄符桃梗以餞餘寒椒酒辛盤爰興嗣歲惟時碩德茂
擁蕃釐恭惟某官和氣積躬惠心孚物恩仁布護助承
流宣化之功動植昭蘇被伸屈榮枯之賜撫辰凝績視
履考祥竚聞課最之升卽有褒遷之寵茲臨穀旦宜協
泰亨某假貳山城希光鄰壁豈無善頌悵莫陪賓客之
後塵賴有尺書猶可舉歲時之故事深慚骭骹難究願
言

賀衡州范奉使啓

剖竹分符欽奉楓宸之眷開藩問俗肆班鴈嶠之春坐
嘯黃堂馳聲遠徼顧有一廬之託敢修尺牘之恭伏惟
某官善能周室之廉官悃幅漢家之循吏久更劇寄浸
陟華途二十石共理之良益隆善最九萬里搏扶而上
行展壯圖豈伊南服之州尚屈東方之騎佇興饋歎即
奉詔趨某望履雖遙依仁蓋切田廬占籍爰居蒸水之
邦廩祿驅人來佐夜郎之郡欽聞渤海太守之化莫獻
漢陽處士之規寫欽止之心賴有子家之執訊歌來暮

之句願繼王褒而作詩歲律方新春陽向淑莫順節宣
之序仰承注倚之懷頌詠徒深敷云莫既

賀范鹽啓

肅膺中詔榮領外臺占使者之星先生躔度叱忠臣之
馭喜動江山凡在庇庥率皆鼓舞伏惟歡慶恭以某官
鍾時間氣為世通材凜若典刑有清白傳家之懿淵然
問學達詩書執禮之言早振迹於巍科亟躋榮於華貫
參籌內府國有贏資疏寵輜軒風生一節煥光華於原

隔動氣色於旌旗載惟翼軫之區莫重荆衡之域清湘
碧嶽悉見版圖赤米白鹽盡歸籌畫坐提綱領兼裕源
流登孟博之車想愜澄清之志用計然之策佇臻富足
之功某籍伍部民名叨官牒久志荊州之識面欣聞刺
史之褰帷我有兒童可備細侯之竹馬公猶膏雨其均
召伯之黍苗贊頌之深敷宣罔既

賀陶鹽啓

宸扈疏恩播西垣之綸綍使星絢彩輝南楚之經躔凡

在庇庠舉增欣忭仰惟慶慰恭以某官高風峻潔雅志
澄清握蘭而趨丹墀振憲部詩人之偉躅持衡以司文
柄萃南宮進士之敷言輟更直於鵷鴻寄寵權於食貨
風生英節聲動熊湘蓋九重惟心德之知視萬里等門
庭之邇禮樂新從於天上想工歌三而拜三源流已具
於目中將百姓足而君足行推鞭算即見錢流第虞攬
轡之勞難屈持衡之彥某一屢蒸水幸足資才半剝荆
游方安懷綬願風勤於仰斗快將覩於褰帷固有兒童

可憐細侯之竹馬豈無耦具會瞻公子之繡衣贊頌之
誠敷陳罔既

賀曹鹽啓

肅膺中詔榮領外臺占使者之星光生躔度叱忠臣之
馭喜動江山凡在庇庥率皆鼓舞仰惟歡慶恭以某官
鍾時間氣為世通材凜若典刑有清白傳家之懿淵然
問學達詩書執禮之言早騰播於休聲亟踐揚於華貫
握蘭省闥綽有能稱剖竹侯藩茂凝嘉績斂翼翼偕於

鴻漸搏風有待於鵬程持釜出郊蹇屈雲霄之步武乘
輶問俗載揚旌節之光華矧惟南楚之上游式據重湖
之劇壤胡床夜月江環庾亮之樓流水桃花煙瑣秦人
之洞丹砂朱橘悉見版圖赤米白鹽盡歸籌畫坐提綱
領錢穀必問其幾何肯較錐刀會計亦當而已矣惟朽
貫腐糧之積皆摘山煮海之謀利孔寔洪弊源斯窒推
鋒盤錯稔聞游刃之餘拭目匪伊會見賜環之召某叨
丞屬郡仰德臺屏英規未覩於雲天崇譽久欽於山斗

輒露依歸之素少伸慶贊之私棲巢蔭之一枝茲焉有
託泛恩波之萬頃浩矣無涯祝頌之心敷宣罔既

賀益陽趙宰啓

疏思芝檢出宰花封綸綍甫頒驪已騰於四境忻懽所
暨喜尤倍於輿情欲寫寸誠敢憑竿牘恭惟某官稟資
英邁毓德粹純學問該明洞八牕於胷次文章雅健倒
三峽於毫端清時蚤見於一鳴淡墨榮標於千佛薦揚
滋久譽處彌休輟唐朝臺閣之賢膺姬室子男之寄然

百里豈久淹之地而九重興見晚之懷竚邁尺一之招
歸奉畫三之渥某寒儒冷族俗狀凡材三獻技於禮闈
有慚畫虎始綴名於銓部謾曰為箕屬茲試吏之初聞
有戒期之命想言游學道當流化於絃歌則杜甫折腰
敢憚勞於趨走方備數百寮之末可濫吹一律之竽幸
甚依仁庶其藏拙邈風以往豈無預下之教條望履而
趨行遂親承於罄欵傾依之切敷述奚殫

賀鄧守啓

望重皇華權舶貨低昂之寄恩分渙號更侯邦屏翰之
崇釋周家六轡之勞厯漢室三公之選先聲甫暨輿議
交欣恭惟某官厚德鎮浮長才濟劇清風不墜江東良
守之雲初篤行無渝高密元侯之軌範早擢儒林之秀
旋膺詔節之榮入亞二卿贊國計軍儲之調度出將使
指總蠻琛夷寶之阜通惟茲中外之徧儀彌見聲華之
藉甚方九重均輕重之勢故千里屈循良之師載惟湘
楚之邦實邇扮榆之社整煩汲直淮陽之拜欲寵買臣